

Denkt onn de Jens ...

hott de Schorsch omm Telefon gesaad unn weil isch nitt wusst wasser wollt unn koo Ontwort gewwe habb, doo hodder nochemol gesaad: Ihr Leit, denkt onn de Jens! Du aach, Honnes.

Jetzt hadd isch moi Sprooch widder gefunne unn frooch: Schorsch, onn was fern Jens solle merr donn denke?

Doo seeder: Ei onn de Jens Mümmelmann.

Onn de Jens Mümmelmann!, habb isch widderholt, unn donn gefroochd: Um warum grad onn den?

Waaßde iwverhaupt noch, wer de Jens Mümmelmann gewese iss?, frächt de Schorsch, weil in de Schul hawwe merr vonem gelese, waaßde dess noch?

Ja, saach isch, unn die Geschicht hott su oogefonge: Jens Mümmelmann, der alte Heidhase ... awwer mieh waaß isch nimmi. Awwer egal, warum donn solle merr onn den Has denke, Schorsch?

Doo seet de Schorsch. Honnes, isch erzähl dess jetz su wie isch misch droo erinnern kann: Der alde Heidhas Jens Mümmelmann hott in de Heide gelesche unn sisch ausgeruht. Awwer uff oomol hodder enn mords Krach geheerd, unn weiler enn alde erfahrene Has gewese iss, wussde sofort was los war: Die Jeescher hawwe mett Treiber unn Hunde e Jachd uff Hase gemacht, hadde aach Labbe uffgesponnd um die Hase ze verschrecke unn omm Fortlaafe ze hinnern unn hawwe uff alles geschosse, was zwaa Löffel, also zwaa lange Ohrn in die Luft gestreckt hott unn fortgerenn iss. De Jens awwer iss leihe gebliwwe unn doo hodden koon Hund unn koon Jeescher gefunne unn de Jens hott die Treibjachd iwverlebt. Awwer nitt long, weil wie de Jens gemoont hott, die Jachd iss vorbei unn jetzt kann isch forthobbele unn ze Owend esse hotts gekrachd unn de Jens iss getroffe worrn. Weil ooner vunn dene Jeescher wollt die Labbe eweckmache, hott de Jens geseh unn hodden erschosse.

Ja, saach isch, su ähnlich hawwe merr dess gelese und isch glaab, die Geschicht iss vumm Herman Löns geschriwwe worrn. Awwer saach emol, Schorsch, warum solle merr jetz onn de Jens denke?

Siehsde, Honnes, seet de Schorsch, weil su wie doomols in de Heide iss dess jetz iwverall: Die Hase, naa die Leit moone, dass die Treibjachd uff dess Virus vorbei iss unn denke, jetz kann uns nix mieh bassiern, sie wern leichtsinnisch unn jetz wern se getroffe. Deede se onn de Jens denke unn wies dem ergonge iss, deede se vorsichdisch bleiwe.

Wie merr ferrdisch warn omm Telefon habb isch vor misch hie gebreweld: Recht hodder, de Schorsch, weil wenn merr die Noochrischde sieht unn heert erfährt merr, dass werklisch vill Leit denke, dess mett Corona wär vorbei. Denkt onn de Jens ... weil wenn die Labbe eweck gemacht wern in de Fluuchhäfe ferrs Fliesche in de Urlaub unn omm Strond, donn konns bassiern, donn kann merr getroffe wern.

Eiern Honnes